

臺灣文獻史料叢刊

第一輯

(2)

臺
灣
府
賦
役
冊
(合訂本)
志

臺灣大通書局印行

臺灣文獻叢刊第六五種

臺
灣
府
志

高
拱
乾

漸序

粵惟人皇九區，神禹五服；三王之世，守若金甌。逮乎炎漢，而玉關極於西境、彩雲見於南中，朔方、交趾列爲州部；禹服之廣，繇茲始矣。自漢而還，代有建置；然唐設羈縻之州、宋稱玉斧之界，土宇版章未云孔厚。竊嘗披覽皇輿，而知一統之盛，無踰今日。伏見我朝定鼎，今天子踐祚而後，外而四方屬國，以數百計；重譯奉琛，項背相望。內而滇、黔天末，闢置郡邑。使自古要荒之域，悉爲冠帶之區；聲教所被，廣矣！

若臺灣孤嶼環瀛，千峰叢立，環拱七閩，如屏障然；然自廈門、金門迤邐東南以達於澎湖嶼，又東而至於臺灣，蓋不知其幾千里也。千古以來，番民處之，邈若蠶叢；中國視之，幾同甌脫。而五、六十年之間，則竟爲潢池弄兵之所矣！我皇上不忍海涘之民、頻罹蛇豕之害，於是命將出師，指授方略，橫海伏波，揚旌飛渡；而波臣效順，風不驚濤，其仰契天心如此！師行所至，莫不束身歸款，若崩厥角；壺漿載迎，市肆如故，其俯得人和又如此！自是而臺灣版圖延袤三千里、戶口數十萬，始得附於光天化日之下矣。迺猶屢睿慮，爲民生計，析置一郡三邑，建設文武諸司。數年以來，生齒漸繁，草萊漸闢，商旅往來，番民和輯，彬彬乎有內郡風焉。蓋前此之開闢土宇，賴諸文武之戮

力同心，宣布威德，其功在封疆，其事在國史；至於後此之拊循安定，賴諸文武之綢繆贊畫，勞心撫字，其功在黎庶，其實在口碑，未可更僕數也。

治揚以庸材，謬奉一麾，深慮寬猛調劑之不易。乃受事伊始，適觀察副使高公，當三年報政之時。問民生疾苦，則公所以軫恤之者甚周；訪地方風俗，則公所以導誘之者甚力。若乃振興文化、勸課農耕、招攜懷遠、遏惡扶良，咸一一布之章程。凡公所施設，惟善後之是圖；是誠治揚與同事諸君子之幸也。時公輯郡志告成，治揚未能有所興革，無可載筆；聊附姓名於簡末，以志承乏之期。亦以見新疆待治，貴乎不擾；惟當遵畫一之法云爾。

康熙三十有四年、歲乙亥秋吉，臺灣府知府三韓靳治揚謹識。

凡例

一、臺灣自康熙二十年始入版圖，其時諸公勞心草創，於郡志未遑修輯。今人心已正，文治漸敷；欲同車書，莫有大於此者。但新闢殊方，事多荒昧。雖博採群言，較諸郡守蔣公毓英所存草稿，十已增其七、八；而才愧三長，仍慮挂漏。爰集守令、師儒，分曹校訂。上自星野，下至物產，分爲十卷，爲目八十。中間規制、官常，一遵王制。言期取乎文，事必綜其實；獲免貽譏幸矣！敢云得體乎哉？

一、山川、形勝，所以設險固圉，亦以領異標奇；分野之後，例首及之。臺灣爲新闢，海疆流峙，異於中原；雖詞客騷人，未多登臨游泛之作。而扞衛四省，屹立大洋；筆之於書，匪特觀美，故於海道三致意焉。

一、規建官師衙署、學校、街坊，類皆草創因仍。至於城池，雖載志目，尙未肇建。蓋域民禦暴，藉百姓而益安；崇墉長濠，非數人所能任。業已請之當事，尙俟經畫。

一、名宦、鄉賢，原以酬庸尚德。臺雖新造，後先君子，人念甘棠。但名位方隆，功勳未竟；欲崇畏壘，俟以他時。

一、人材之興，由於學校。科名者，學校之所爲光；忠孝者，科名之所由立也。然士各有志，而賢不一途。長孺以貲郎顯，鄭侯以刀筆相，安世以門廕侯，膺功偉業彪炳

天壤。又豈盡出帖括乎哉？臺之人物，十年前無所表見；故今所載，自國朝設科始。先記其名，徐觀其用。

一、仲雍居吳，斷髮文身，裸以爲飾。則自江以南，古皆是俗也；況臺灣乎？及今觀之，風俗人文，惟南爲盛；固不得以其陋而限之也。子曰：『君子居之，何陋之有？』作風土志，以畀夫轉移風化之人。

一、普天之下，莫非王土；君子于役，不日不月。租、庸、調者，貢、助、徵之別名也。臺之賦役與內地均，別無希奇可以入獻；亦曰無總于貨寶，生生自庸云。

一、志載藝文，務關治理；苟有裨於斯郡，宜無美而不收。然考獻徵文，前此遠在殊域；談天華國，十年生聚方新。今惟先集所見，上自宸章，下逮新咏；後有作者，當俟之踵事增華。

一、兵燹、災祥，古今多有。臺灣孤懸海外，始鬻倭奴，一變而爲紅彝、再變而爲鄭成功，今歸一統。前此災異，傳聞者，聊書其概，以備觀鑒；非如「齊諧」志異也。

一、綱常長留天地；忠義節烈者，正以立天地之綱常也。臺灣未入版圖之先，蠢爾諸番，曷知倫紀！其自內地來此者，始於明季之通商，繼以僞鄭之俘掠；前後生聚七八十年，間有奇行可書、大節難泯者，得之傳聞，務爲採入；亦表揚幽隱，風勵來茲之意。

一、有文事者，必有武備；所以消反側、靖人心也。故居安慮危，有備無患。臺之武備，設有十營、水陸官兵萬人；總干山立，壯哉軍容！至於軍器，不登此書；蓋示以聖天子耀德不觀兵，暗藏其用於神武而不可測。孔子曰：『民可使由之，不可使知之』。此志亦然。

一、從來郡乘，皆取裁於邑乘。集其大而略其小。臺係新創之區，邑未有乘；凡所收輯，已覺無遺事。分之，愈覺其少；合之，不見其多。故因地制宜，捐俸自梓；藏版於郡，聊盡使者之責云爾。

臺灣府志卷一

封城志

星野 沿革 建置 疆界 形勝

山川(附海島)

古者茅土之錫，星羅碁布，繡壤相錯；各有規方，毋或越焉。厥後罷侯置守，建都立縣，卽黑水流沙，雕題鑿齒之方，靡不統於一尊；時勢然也。然幅員雖廣，必分封域。其間或仰觀以辨疆畫、或俯察以覩勝槩、或因時以審機宜，營造肇興而規模悉定，延袤莫際而經理畢周，非以飾大觀、示無外也，亦使後之撫蒞斯土者，相陰陽風雨之會，知剛柔燥濕之宜，用以奠厥民居，增其式廓，以壯我皇圖云爾。作封域志。

星野

星野之說，昉自「周官」；蓋以星土辨九州之地焉。臺自破荒以來，不載版圖，不登太史；星野分屬，何從而辨？然臺係於閩，星野宜從閩。卽以閩稽之，福建「禹貢」揚州之域，天文牛、女分野。按牛、女於辰爲丑，銀海之屬，星紀之次。銀海，元武象也；星紀，吳、越分也。劉向曰：『吳、越，屬斗、牛、女分』。晉、隋、元志：『吳、越其辰在丑』。由是，而說者謂：臺在泉州之窮南，去省會遠矣，不宜爲銀海之屬；又

在漳州之極東，去吳、越更遠矣，不宜爲星紀之次。雖曰天覆閩極，而至窮南、極東，星土不無少異；遂有以臺郡分野，當在女、虛之交者。虛，元枵之次，在子之辰；以臺之稍遙而東，遽疑其越次、越辰，是亦坐井觀天之見也。即不必論天之覆轡，而以近事考之：明時澎島統於泉，泉分野非從省會爲牛、女乎？則臺依泉，爲牛、女分自可無疑矣！更以近地考之：臺海西界於漳，南鄰於粵，而北則閩安對峙；漳分野視閩，而粵分野視漳焉。有臺之錯壤相接，獨不屬之牛、女乎？唐僧一行有云：『星紀當雲漢下流，百川歸焉；故其分野，自南河下窮南紀之曲，東南負海爲星紀』。則臺郡宅東南，分野仍屬牛、女；又與一行之說相符。近考之時事、遠證之前言、旁測之地里，紀臺星野，終必以牛、女爲定衡也。

沿革

臺灣，古荒裔地也。前之廢興因革，莫可考矣。所得故老之傳聞者，近自明始。宣德間，太監王三保舟下西洋，因風過此。嘉靖四十二年，流寇林道乾擾亂沿海，都督俞大猷征之，追及澎湖，道乾遁入臺；大猷偵知港道紓廻、水淺舟膠，不敢逼迫，留偏師駐澎島。時哨鹿耳門外，徐俟其弊。道乾以臺無居人，非久居所；恣殺土番，取膏血造船，從安平鎮二鯤身（鯤身嶼名）隙間遁去占城（占城屬廣南。今尚有道乾遺種）。道

乾既遁，澎之駐師亦罷。

天啓元年，顏思齊爲東洋國甲螺（東洋，即今日本。甲螺者，卽漢人所謂頭目是也；彝人立漢人爲甲螺，以管漢人），引倭屯聚於臺，鄭芝龍附之，始有居民。既而，荷蘭人舟遭颶風飄此。甫登岸，愛其地，借居於倭；倭不可，荷蘭人給之曰：『只得地大如牛皮，多金不惜』。倭許之。紅彝將牛皮剪如繩縷，周圍圈匝，已有數十丈地；久假不歸，日繁月熾，無何而鵠巢鳩居矣。尋與倭約：而全與臺地，歲願貢鹿皮三萬張；倭嗜利，從其約。荷蘭人善用砲攻，其居臺也，以夾板船爲犄角；雖兵不滿千，而南北土酋咸聽命焉。海濱巨商，常來往貿易。庚寅，甲螺郭懷一謀逐紅彝；事覺，召土番追殺之，盡戮從者於歐汪（歐汪，地名；卽今鳳山縣仁壽里）。懷一旣誅，何斌代爲甲螺。商民在臺者，被土番殲滅不可勝數；而商賈視臺爲畏途矣。

辛丑，鄭成功自江南喪敗，其勢日蹙；孤軍廈門，圖退步地。適紅彝甲螺何斌負彝債逃廈，誘其進取臺灣。從來鹿耳門屈曲盤旋，沙浮水淺，非善水者不得渡；時鄭舟至鹿耳，水忽漲十餘丈，巨艦縱橫畢入。豈天假手於鄭，以式廓我朝無外之疆域也！荷蘭與成功戰不利，遂退保臺灣土城，歸一王（歸一王，紅彝帥名）以死拒之。鄭師力攻不克，環山列營以困之。荷蘭勢窮，復整夾板船十餘艘與成功決戰；成功因風縱火，焚燒彝艦。荷蘭大敗，然終無降意。成功使人告之曰：『此地乃我先人故物；今所有珍寶聽

而載歸，地仍還我，兵始罷』。荷蘭知勢不敵，爰棄城歸。成功就臺灣土城居之，改臺灣爲安平鎮、赤嵌爲承天府，總名東都；設府曰承天府，設縣曰天興縣、萬年縣。未幾，成功死。子經居鶯江（即今廈門），成功弟世襲陰有竊拒意；經攻逐之，世襲渡海歸誠。經嗣立，改東都爲東寧，改二縣爲二州，設安撫司三：南路、澎湖各一。興市廳、搆廟宇，招納流民，漸近中國風土矣。

辛酉，經死，子克塽嗣；幼冲，在位政出多門，人心已渙。康熙二十一年，總督姚探知虛實，用間諜陰齋劄付到臺，離散其左右；結傅爲霖爲內應，垂成事洩，爲霖遇害。越癸亥，靖海將軍侯施統率舟師進征。六月，由銅山直抵澎湖八罩澳，取虎井、桶盤嶼克之。誓師戒嚴，不許妄殺。一戰而澎湖耆定。克塽識天命有歸，遂籍府庫納地輸誠。於是廷議設郡建官，制度規模燦然聿新，於以徵道一風同之盛云。

附僞藩鄭氏降表

招討大將軍延平王臣鄭克塽謹奏：爲舉國內附，仰冀聖恩事。竊惟臣生自海邦，稚懵無識；謬繼創垂之緒，有乖傾向之誠。邇者，樓船西來，旌旗東指；簾壘緩迎於周旅，干羽煩舞於虞階。自省重愆，誠爲莫贖。然思皇靈之赫濯，信知天命有攸歸。逆者亡、順者昌，迺覆載待物之廣大；貳而討、服而舍，諒聖王與人之甚寬。用遵往時之成命，爰邀此日之殊恩。冀守宗祧以勿失，永作屏翰於東方。業有修表具奏外，及接提督臣施琅來書，以復居故土，不敢主張。臣思旣傾

心而向化，何難納土以輸誠。茲特繕具本章，并延平王印一顆、冊一副及武平侯臣劉國軒印一顆、忠誠伯臣馮錫范印一顆，啟遣副使劉國昌、馮錫韓齋赴軍前繳奏；謹籍土地人民，待命境上。數千里之封疆悉歸王宇，百餘萬之戶口並屬版圖。遼海而南，永息波濤之警；普天之下，均沾雨露之濡。實聖德之漸被無方，斯遐區之極負恐復。獨念臣全家骨肉，強半孺嫗；本係南人，不諳北土。合無乞就近閩地方，撥賜田莊、廬屋，俾免流移之苦，且獲養贍之資；則蒙高厚之生成，當誓丹青以啣結。至於明室宗親，格外優待；通邦士庶，軫念綏茅；文武諸官，加恩遷擢；前附將領，一體垂仁；夙昔仇怨，盡與蠲除；籍沒產業，俱行賜復。尤期廣推寬大之仁，明布維新之令。使夫群情允愜，共鼓舞於春風；萬象熙恬，同泳游於化日。斯又微臣無厭之請，徼望朝廷不次之恩者也。爲此，激切具本奏聞，伏候勅旨。

建 置

臺灣濱山阻海，居要荒之外。明嘉靖間，澎湖屬泉州安，設巡檢守之。旋以海天遙阻，棄之。崇禎間，荷蘭人居臺，亦舍澎湖；惟建臺灣、赤嵌二城（臺灣城，今安平鎮城；赤嵌城，今紅毛樓），規制甚小，名城而實非城。設市於臺灣城外，遂成海濱一大聚落。順治間，鄭成功取臺灣，稍爲更張：設四坊以居商賈，設里社以宅番漢；治漢人有州官，治番民有安撫。然規模不遠，殊非壯觀。至康熙二十二年歸我國朝，建置始詳。設府一、縣三：府曰臺灣（統三縣）。邑曰臺灣，是爲附郭（轄十五里、四坊）；曰鳳

山（轄七里、二莊、十二社、一鎮、一保）、曰諸羅（轄四里、三十四社），地分南北焉。治文事，則有分巡道及府、廳、縣（詳載「秩官誌」）；修武備，則有總鎮府及副、參、遊（詳載「武備志」）。府庠、縣庠，廣文各一；正學、明倫、風布三代。設保甲以剔奸（詳載「規制志」），立汛防以衛民（詳載「武備志」）。凡所建置，皆因人情而宜土俗；制云隆矣！法云善矣！雖城池未設，而千萬人一心；豈不安如磐石、固如金湯歟？

疆界

唐、虞之世弼服五千，成周職方氏掌天下之版圖，則疆界不可不辨也。臺自建置以來，設府一。其府治，東至保大里大脚山五十里爲界，是曰中路；人皆漢人。西至澎湖大海洋爲界，亦漢人居之；除澎湖水程四更（水程無里鋪，舟人只以更數定遠近。一更，大約旱程五十里）外，廣五十里。南至沙馬磯頭六百三十里爲界，是曰南路；磯以內諸社，漢、番雜處，耕種是事，餘諸里、莊，多屬漢人。北至雞籠山二千三百一十五里爲界，是曰北路；土番居多。惟近府治者，漢、番參半。至於東方，山外青山，迤南亘北，皆不奉教。生番出沒其中，人跡不經之地；延袤廣狹，莫可測識。

臺灣縣治，附郭。除澎湖三十六嶼（澎有三十六嶼，各孤懸於巨浸中。地之廣狹，里之短長叢雜不可紀極。詳載「山川志」），東至保大里大脚山五十里；西至澎湖水程四

更，除水程外，廣五十里；南至鳳山縣依仁里交界，十里；北至新港與諸羅縣交界，四十里。南北延袤五十里。

鳳山縣治，在臺灣府南一百二十五里。東至淡水溪二十五里，西至打鼓山港二十五里；東西廣五十里。南至沙馬磯頭三百七十里，北至臺灣縣文賢里二贊行溪一百二十五里；南北延袤四百九十五里。

諸羅縣治，在臺灣府北一百五十里。東至大龜佛山二十一里，西至大海三十里；東西廣五十一里。南至新港溪與臺灣縣交界一百四十里，北至雞籠城二千一百七十五里；南北延袤二千三百一十五里。

形勝

臺灣府襟海枕山，山外皆海。東北則層巒疊嶂，西南則巨浸汪洋。北之雞籠城，與福建省對峙；南而沙馬磯頭，則小琉球相近焉。諸番檣櫓之所通，四省藩屏之所寄；戍以重兵、擇人而治，內拱神京、外控屬國。實東南門戶，非若珠崖可得議棄者也。

臺灣縣，木岡山聳峙雲霄，赤嵌城危臨海渚；日暮烟霞，極蜃樓海市之鉅觀。外有澎湖三十六嶼，星羅碁布；內有鹿耳門，海天波濤，紆廻曲折，險要固塞之地，莫或最焉。

鳳山縣，旗、鼓天生（旗、鼓，二山名；在縣治之南）、龜、蛇地設（龜、蛇，二山名；在縣治之南北）；鳳（山名）鳴高岡，鯤（嶼名鯤身）蟠巨海。最特出者，有傀儡山于霄挿漢，東渡指南。又有淡水水流清，蓮池莊葩（在文廟前），郎嬌波濤，貫耳如雷。所謂奇觀勝槩，約略如此。

諸羅縣，雞龍山在其北，龜佛山在其南；斗六門流匯大海，半線港直接奧區。其龍縱之廻環者，不可紀極；而其浩瀚之奔流者，無不朝宗。

曲川（附南巡）

臺灣府山

臺灣山形勢，自麗者之五虎門綱輶渡海；東至大肚中二山曰麗岡，曰白獸者，是臺灣諸山脈龍首也。隱伏波濤，穿海波洋，東臺之靠鼎山，始結一脈；扶膺研礪，成山谷，或平地，歷經二千餘里。據山屹峙不可紀極。大約（臺灣）之山，背東溟，面西海，而郡邑居其中。自木興山（在府治東北約百三十餘里，巍峩特聳。其頂每罩雲霧，必麗天氣晴朗之時，方見山形。遠望其峯，上與天齊。臺灣之山，惟此山最真大。是為郡山之祖焉）南至大興山（在府治東南。此山離府三十餘里。山上有大石聳秀，形如冠帽。中有大圓石洞。其山能鳴；鳴則非吉祥之兆）。層巒聳翠，上出重霄，為臺灣縣治（大興

臺灣府志卷二

規制志

城池 衙署 學校 社學 書院 學田 倉廩 坊里 保甲
旗廟 橋梁 津渡 水利 坊表 市鎮 郵傳 阿嘉 他政

車書一統矣！提封何啻萬里，海外亦壯金湯。自是而出政有所、育才有地、積貯有備、祈報有時，封洫錯於塗，井廬秩於伍，旌節交於衢路，帆檣來於遠近，以至廢疾得遂養，澤骨有深仁。視諸中土郡邑大政，無不具舉而罔遺也。則規維其新，制隆於古。作規制志。

城池

府城 卜在永康里。未築。附郭：臺灣縣。

鳳山縣城 卜在鳳龍莊。未築。

諸羅縣城 卜在霧化里。未築。

安平鎮城 在鳳山縣轄安平鎮一員身之上。係紅磚砌一王所築。用大磚，樹牆，灰共構而成。城基入地丈餘，城牆各橫俱用鐵釘釘之。周圍廣二百二十七丈六尺，高三丈

烏松樹 在永康、武定二里交界，為北路要衝。
舊社街 在歸仁南保。

鳳山縣

安平鹽街 廟中市物轉賣於此，遂成街。
牛路竹街 在社寮里。
萬隆莊街 在興隆莊。

諸羅縣

日加濃潤街 在舊化里。縣裡多番班，鄉民需物皆市府中；獨此一二列肆，故名

街。

郵傳

臺境東阻山而西臨海，鳳、諸二縣分轄南北，故只設南北二郵。其東西爲境狹，非
要路，不置傳焉。

臺灣縣

府前舖 南抵南路舖二十里、北抵北路舖二十里。

南路鋪 北抵府前鋪二十里、南抵鳳山縣界二贊行溪鋪二十里。
北路鋪 南抵府前鋪二十里、北抵諸羅縣界新港鋪二十里。

鳳山縣

興隆鋪 在縣前。南抵下淡水鋪一百二十里、北抵楠仔坑鋪一十七里。

楠仔坑鋪 南抵興隆鋪一十七里、北抵中衝崎鋪一十三里。

中衝崎鋪 南抵楠仔坑鋪一十三里、北抵鯽仔潭鋪二十六里。

鯽仔潭鋪 南抵中衝崎鋪二十六里、北抵二贊行溪鋪二十四里。

諸羅縣

佳里興鋪 在縣南。南抵蕭籠鋪一十五里。

蕭籠鋪 東抵目加溜灣鋪十里、北抵佳里興鋪一十五里。

目加溜灣鋪 南抵新港鋪二十里、西抵蕭籠鋪一十里。

新港鋪 南抵北路鋪二十里、北抵目加溜灣鋪二十里。

麻荳鋪 在縣北路。西南抵佳里興鋪一十里、北抵茅港尾鋪一十里。

茅港尾鋪 南抵麻荳鋪一十里、北抵大路邊鋪八里。

- 大路邊鋪 南抵茅港鋪尾八里、北抵赤山仔鋪七里。
赤山仔鋪 南抵大路邊鋪七里、北抵新國鋪八里。
新國鋪 南抵赤山仔鋪八里、北抵倒喀臘鋪七里。
倒喀臘鋪 南抵新國鋪七里、北抵諸羅山鋪五十里。
諸羅山鋪 南抵倒喀臘鋪五十里、北抵打貓鋪三十里。
打貓鋪 南抵諸羅山鋪九十里、北抵他里霧鋪三十里。
他里霧鋪 南抵打貓鋪九十里、北抵猴悶鋪五里。
猴悶鋪 南抵他里霧鋪五里、北抵柴裏鋪三十里。
柴裏鋪 南抵猴悶鋪三十里、北抵草埔鋪三十里。
草埔鋪 南抵柴裏鋪三十里、北抵西螺鋪三十里。
西螺鋪 南抵草埔鋪十五里、北抵埔薑林鋪三十里。
埔薑林鋪 南抵西螺鋪三十里、北抵小岡鋪二十里。
小岡鋪 南抵埔薑林鋪二十里、北抵大武郡鋪三十里。
大武郡鋪 南抵小岡鋪三十里、北抵大肚溪鋪四十里。
大肚溪鋪 南抵大武郡鋪四十里、北抵半線鋪二十里。
半線鋪 南抵大肚溪鋪二十里。